

Hei Bärba... ..

I ha de Sabrina as Värslig Schrübe ù gsit, i sigi haud nùme de Küssu ù nid de lieb Gott,

drùm cha i o säge wenn, ù was i o wott...

Nei, z Predige wü wir andere überla,

ù dir ifach no as Momentli zür Sita stah.

Dir nùme a üser Sita z ha ù z gseh,

das isch schwer z'verstah ù tuet doch so weh.

Bärba, mengisch hi wir doch sicher ali a dä Moment scho deicht,

was weri wenn, hi wir üs überlit, ù dem, üser Gedanke gscheicht.

Aber nùme dran deiche, isch so a Sach, das isch o nid schwer,

aber wes so isch, wi wenn es doch weri, das belaschtet ihm haud sehr.

Ja, eper verliere, ù nùme au Tage ùm sich z'ha,

mit dem mues mü zersch lehre ùma z'gah.

Nid nùme dini Familie muess das Lehr z mache,

o wir, alli hie vermisse doch dis Lache.

De Zoggu het mir gfragt, ob i dir hie as par Wörtli wetti widme ù verzöle,

hmm, Bärbe, das isch für mir kis müesse ù scho grad gar kis sölle.

Vo ganzem Härze si au miner Sprüch ù Texte bis jetzt doch cho,

di hi bi mir, hufe Chümmer ù Lide mitsich gno.

Ifach so, gredi fort schribe, was i wot säge,

dir di Sache verzöle ù mitgä, ùf diner Wäge.

Schöner weri doch, i hetti dir das aus is Gsicht chöne prichte,

dir agügge liebi Bärba, ù für dir so doch dichte.

Aber wir gugge füri, ù nid zrüg, näme di Zit wo no würd cho,

dù aber wüsch üs fehle, dir hisi ja ùs Engu, i Hümmü gno.

Bärba, wir chü dir nid gseh, chü ù wü ifach nùme a dir deiche,

wir wü allizäme, dir üser Gedanke scheiche.

Bärba, la üs wüsse, dass dù ùma büsch ù üs o tuesch verschtah,

o we wir haud alli zäme inisch, üser Wäge wiltersch gah.

Bärba, a Platz i au üsne Härze hesch dù ùf sicher ù becho,

di Kampf isch nid vergäbe gsi, wo dù hesch ùf dir gno.

Bärba, dini Familie, wir alli zäme wäre dir sicher nie vergässe,

o we wir amau wäre ha, früschi Gedanke ù anderi Inträsse.

I Platz bi üs isch haud jetzt leer,

das z verschtah, isch so schwer.

Bärba, los für a churza Moment i au üser Härze ù Gedanke i,

so isch haud z Läbe, wir chüs no gniesse, so sous o si...

Bärba, wir vermisse di!!!!